

KvK ta anuncia directiva pa aña 2025:

A eligi presidente y vice-presidente di directiva di KvK

Conforme stipulacion den ley, Camara di Comercio y Industria (KvK) ta representa comercio y industria di Aruba. Directiva di KvK, cu ta consisti di 9 miembro, ta wordo eligi door di representantenan di negoshinan grandi “grootbedrijf” como tambe di negoshinan chikito “kleinbedrijf”.

Den e prome reunion di directiva di KvK, e miembronan ta eligi un presidente y un vice-presidente pa e aña actual. Alabes ta keda determina cual miembro lo fungi



como e presidente suplente. E presidente y vice-presidente, hunto cu e secretario/director ehecutivo, ta forma e directiva diario di KvK.

Pa aña 2025, e miembronan di directiva a reeligi Sr. Diederik Kemmerling como presidente y Sr. Robert Croes como vice-presidente. Bou di e liderazgo di Sr. Kemmerling cu ta miembro di directiva di KvK ya pa 4 aña, KvK a logra na 2024 varios meta y a organisa diferente eventonan grandi e.o. a desaroya un plan strategico nobo y a dialoga continuamente cu diferente stakeholder clave y cu Gobierno, a boga pa un solucion pa e escasez di trahado, cual a resulta den un proceso simplifica pa permiso di trabou cu a drenta na vigor riba 1

di augustus 2024, a organisa diferente eventonan impactante, incluyendo e Aruba Chamber Business Island Event y un debate politico, y a introduci un branding moderno pa KvK cual ta representa e vision progresivo di KvK.

Sr. Robert Croes ta un comerciante cu ta activo den diferente sector y ta miembro di directiva di KvK desde aña 2023. Demas miembronan di directiva di KvK ta Sra. Monica Kock, Sr. Gavril Mansur, Sr. Derrell Maxwell, Sr. Devaney (Dave) Martinus, Sra.

Nathalie Moore y Sr. Omar Tromp cu lo fungi tambe como presidente suplente den caso cu e presidente of e vice-presidente ta ausente. E miembro saliente ta Sr. Eugene Farro y e miembro nobo ta Sra. Roxanne Solognier-van Dinter.

E directiva di KvK ta encarga cu e maneho y strategia di e organizacion, cu asistencia di e secretario/director ehecutivo, Sr. Martijn Balkestein, kende alabes hunto cu e personal di KvK ta percura pa e funcionamiento y actividadnan diario di KvK.

Expertonan multidisciplinario a encuesta hoben riba diferente contexto

E siman aki, minister demisionario di Husticia y Asuntonan Social, Sr. Rocco Tjon a reuni cu e ekipo multidisciplinario di expertonan for di Instituto Pedagogico Arubano y Vrije Universiteit Amsterdam, kende a percura pa encuesta hobennan a traves di un lista di pregunta. E preguntanan aki ta enfoca riba e contexto escolar, esun di bario, esun di cas y por ultimo nan bienestar fisico y mental.



Pa haci e investigacion mas completo a papia tambe cu mayor, directiva, maestro y trahadonan social, den tur e diferente districtonan. Riba

nos peticion a inclui tambe recomendacionnan specifico pa por duna un respuesta na e hallazgonan di e investigacion. E recomendacionnan

aki lo wordo presenta dentro di poco na Consejo di Minister. “Ya caba den presupuesto 2025 tin fondonan adicional



aloca pa e sector social, y nos lo boga pa esaki keda asina tambe pa di e forma ey e recomendacionnan concreto por wordo realisa,” segun un co-

municado di gobierno. “Nos ta gradici henter e ekipo cu a haci e investigacion aki, cu ta hopi importante pa e futuro di Aruba, un realidad.”

Reunion entre prome minister y minister di Husticia di Aruba cu minister di Defensa Hulandes tabata basa en gran parti riba e situacion na Venezuela

Diaranson mainta, Prome Minister Evelyn Wever-Croes hunto cu Minister Rocco Tjon a reuni cu Minister di Defensa di Hulanda, señor Ruben Brekelmans cu tabata di bishita na Aruba pa un dia pa un reunion cu Gobernador, Gobierno y Mariniers Kazerne riba e situacionnan cu Marina Hulandes ta encarga cune.



Prome Minister a indica cu no ta un secreto cu e situacion na Venezuela ta preocupante, no solamente pa Aruba sino pa Hulanda tambe, y p’esey gran parti di e reunion tabata basa riba e tema aki, y con Aruba ta prepara pa cu-

alkier eventualidad. Prome Minister a duna di conoce cu aunke e situacion cu Venezuela ta aden no te e miho, comunidad di Aruba por ta tranquil mirando cu actual-

mente no tin ningun indicacion di riesgo of menasa pa nos isla. E plan pa 2025 ta pa Aruba y Hulanda sigui traha hunto riba e desaroyo di mas plan

pa asina den caso di cualkier eventualidad, of si tin infiltracion di forsanan di otro pais via Venezuela pa ataca Aruba, cu nos ta bon prepara y no mester tin ningun preocupacion.

Durante e reunion tambe a elabora riba e tema di e posicion di e Arumillers. Prome Minister a indica cu Gobierno ta den e fase pa profesionalisa e Arumillers pa asina e personanan cu ta Arumil haya un posicion mas fuerte anca tanto den ley como den nan posicion huridico como militar. E proyecto aki ta den su fase final y ta danki na e bon cooperacion cu tin entre Aruba cu Hulanda.

Por ultimo tambe a pasa riba e tema di gobernacion y e relacion cu tin actualmente entre Aruba y Hulanda, y con por fortifica e relacion aki pa yuda nos aki na Aruba un poco mas.

“E reunion a bay hopi bon, y mi ta contento di por a scucha con Aruba ta preparando su mes riba tur tereno, tanto cu Marina aki na Aruba, y cu defensa di Hulanda, pa asina comunidad no mester tin ningun preocupacion pa loke ta desaroyonan den nos region”, Prome Minister a expresa.